

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 70 0 Rs 006228 17 Spp
Sarajevo, 22.05.2017. godine

Vrhovni sud Federacije Bosne i Hercegovine u Sarajevu, odlučujući o zahtjevu advokatice Džejlane Šaćirbegović-Alibašić iz Zenice za rješavanje spornog pravnog pitanja, na osnovu odredbe člana 61c. (stav 1) Zakona o parničnom postupku, te odredbe člana 18. Pravilnika o unutrašnjem sudskom poslovanju Federacije BiH i Brčko distrikta, u sjednici Građanskog odjeljenja održanoj 22.05.2017. godine donio je slijedeću:

O D L U K U

Odbacuje se zahtjev advokatice Džejlane Šaćirbegović-Alibašić za rješavanje spornog pravnog pitanja broj 70 0 Rs 006228 17 Spp od 03.04.2017. godine.

O b r a z l o ž e n j e

Ovaj sud je dana 03.04.2017. godine zaprimio molbu (pravilno zahtjev) advokatice Džejlane Šaćirbegović-Alibašić iz Zenice, u kojem se traži tumačenje termina „izuzeće“ i „isključenje“ sudije u slučaju primjene odredbe člana 264. Zakona o parničnom postupku, prema kojoj u ponovnom postupku pred prvostepenim sudom ne može postupati sudija koji je odlučivao u prijašnjem postupku. Navodi da se u većem broju sudskih postupaka pred Općinskim sudom u Travniku pojavljuje isto sporno pravno pitanje u slučajevima postupanja prvostepenih sudova u ponovnom postupku nakon ukidanja prvostepenih odluka, a koje se svodi na pitanje da li ponovljeni prvostepeni postupak vodi novi sudija kako to propisuje član 264. stav 1. ZPP ili da postupak vodi sudija koji je odlučivao u ranijem postupku, kako smatra predsjednik Općinskog suda u Travniku. Uz molbu je dostavljeno rješenje Kantonalnog suda u Novom Travniku broj 51 0 Rs 092008 15 Rsž od 17.03.2008. godine kojim je žalba tužene uvažena, presuda Općinskog suda Travnik broj 51 0 Rs 092008 14 Rs od 26.08.2015. godine ukinuta i predmet vraćen prvostepenom sudu na ponovni postupak i rješenje Općinskog suda u Travniku broj 051-0-Su-17-000-408 od 15.03.2017. godine kojim je odbijen zahtjev za isključenje postupajućeg sudije Azera Ulemić od postupanja u predmetu tog suda broj 51 0 Rs 092008 17 Rs 2 kao neosnovan. Nije dostavljen predmet Općinskog suda u Travniku.

Odredbom člana 61a. stav 1. Zakona o parničnom postupku (Službene Novine F BiH, broj 53/03, 73/05, 19/06 i 98/15) je propisano da se postupak pred Vrhovnim sudom Federacije radi rješavanja spornog pravnog pitanja pokreće zahtjevom prvostepenog suda po službenoj dužnosti ili na prijedlog stranke.

Odredbom člana 61b. Zakona o parničnom postupku je propisano šta zahtjev iz člana 61a. stav 1. Zakona o parničnom postupku treba sadržavati, a odredbom člana 61c. istog zakona,

da će Vrhovni sud odbaciti nepotpun ili nedozvoljen zahtjev za rješavanje spornog pravnog pitanja.

Kako u konkretnom slučaju postupak za rješavanje spornog pravnog pitanja nije pokrenut od strane prvostepenog suda, to jest na način koji je propisan odredbama člana 61a. i 61b. Zakona o parničnom postupku, to nisu ispunjeni uslovi da Vrhovni sud Federacije BiH postupa po podnesenom zahtjevu, zbog čega se isti na osnovu odredbe člana 61c. istog zakona odbacuje.

Predsjednica Građanskog odjeljenja

Zdravka Grebo-Jevtić